

Skiweekend 2024

Wie jedes Jahr isch Besammlig im Chrütz zSubige. Es bar hei no es Gipfeli odr Kafi idr Hang. Und wie jedes Jahr wird über sgliche diskutiert. Het öper scho öpis ghört vom Migu? Ischer äch scho uf? Het ihm scho öper aglüte? Ig ha ou scho s Natel zückt, aber es isch jo ersch 53 do muessme noni närvösele. Doch das mou hei mir ihm aui unrächt do, üse Organisator isch pünktlich ufd Minute vor Ort gsi. Acho idr Länk simer üs nach dere Fahrt churz im Gade go sterche, das mou sogar ohni Parkbuess. Nachem umlade und parkiere ischs de äntlich los gange. Die Einte si diräkt ufe Lift und Angeri hei zur Ufwermig mitemne Icherschwung gstartet. So richtig nach Winter hets nümme us gseh. E wisse Streife dürne grüeni Landschaft. Aber d Sunne het gstrahlet, d Pischde si guet präpariert gsi und bis churz nachem Mittag eigentlich völlig ok zum fahre. S Holzskirenne wo grad statt gfunge het, schint so spannend zgsi si, dass gwüssi gar nüm rächt vodr Terasse zlocke si gsi. Am spätere Nomi hei mir üs nomou aui idr Walleg- Stube troffe und die letschde Sunnestrahle gnosse. Mir hei gad wöue zahle, die erschte si scho abgloff richtig Huus. Plötzlech chunnt e Gruppe dPischde zdüraab und hockt zu üs a Tisch. Es si die Holzskifahrer gsi. Eine het es Örgeli drbi gha und het de ou grad afo spile. Nid lang ischs gange und plötzlich si mir mitz ire Chöubi inne gsi. Es isch gsunge worde und ou s Tanzbei heimer gschwunge. Richtig luschtig und zfride. Dr Yannis het sogar e Schuelig uf dene Holzski übercho und sich de ou grad zur Verfügig gstellt, nöchschd Jahr a däm Renne zstarte. Dr Hanspeter Schläppi het das Jahr das Renne gwunne. Klar ischs nid lang gange het üse Gian Schläppi und är es Gsprächsthema zäme gfunge. Wo de äntlich aui im Huus si gsi, hets de ou scho Znacht gä. Feini Äplermagrone wie immer. Dr Obe isch gmüetlich und zfride gsi, es het vöu zdiskutiere gä und a jedem Tisch isch irgend es Spili gspöt worde. Am Morge isch gli mou klar gsi dases äüä nüt me wird mit Skifahre. Wägem starche Wind si fasch aui Lifte zue blibe. Nachemne gmüetlech Zmorge hei mir de üsi Sache zäme packt, s Huus ufgrumt und putzt. Us Alternativprogramm si mir de ufem Heiwäg no zäme go Zmittag ässe is Hans im Glück in Muri. Zrugg in Subige ischs de das ou schowidr gsi. Es tolls Weekend mit kule Lüt und super Stimmig. Merci aune wo drbi si gsi.

Tony Sury

